

Varios grupo ta interesa riba e tereno di Valero

ORANJESTAD – Valero ainda ta keda den bista publico, mirando cu tin varios grupo interesa, no den e refineria, pero riba e tereno. Esaki ta segun informacionnan no oficial cu BON DIA ARUBA ta dispone di dje.

GRUPO CHINES

Tin indicacion cu tin un grupo Chines cu ta doño di un compania grandi di LED, ta interesa riba e tereno pa asina pone nan fabrica, sea cu ta e tereno completo of parcial. E pregunta ta keda dicon un compania asina grandi di LED, manera cu ta indica, ta interesa, siendo cu den Latino America mes tin basta luga caminda nan por traha y expande riba un suma hopi mas barata.

CORIENDO PA BELASTING

Loke ta mas obvio ta cu hasta Arubianonan cu kier establ-

ece negoshi riba nos propio pais ta pensa un par di biaha, mirando cu belasting akinan ta sumamente halto. Segun e website therichest.com, Aruba ta para como number 1 cu un porcentahe di 58,95 porciento riba impuesto, haciendo esaki poco atractivo pa companianan di exterior pa inverti den nos pais. Pero asina mes, di un manera of otro, sinembargo ta haya gruponan cu ta keda interesa.

PDVSA

Pa loke ta PDVSA ta conoci cu tin combersacion andando, pero esaki no ta keda un opcion, mirando cu e compania aki di petroleo no ta uno stabiel. Si nos sigui noticianan internacional, ya caba na Corsou, e permiso di e compania aki a vence dia 31 di December, aunke cu esaki a pasa silenciosamente. Si un compania cu, segun medio-

nan internacional, ta instabil, ki beneficio e por trece pa nos pais.

DESAROYO DI E AREA

Tambe loke a yega na atencion di BON DIA ARUBA, cu tin otro grupo cu ta interesa pa desaroya full e area aki, convirtiendo esaki den un di dos Las Vegas. Esaki no ta un mal idea, sinembargo gobierno mester duna su aprobacion pa asina sondea e posibilidad. Cuestion ta cu si haci esaki, con lo bay para cu e casino parti pabao di Aruba. Tur esaki ta preguntanan cu, den transcurso di tempo lo mester haya un contesta riba nan.

EXPLORACION

Rumornan ta coriendo cu gobierno ta pensando pa laga e tereno di Valero intocabel pa mira si despues di un exploracion di petroleo den fondo di awanan teritorial di

Aruba, lo por duna resultado. Tanten cu no sa si Aruba tin petroleo of gas, no por kita e refineria.

E informacion aki ta coriendo pa varios decada caba, pero for di e tempo ey no por a sondea ni duna garantia si tin petroleo of no.

SIGUI CU TENDENCIA MUNDIAL

Tin cambianan grandi ta pasando den mundo y Aruba ta canando un caminda di cangreu. Na luga di sigui cu e tendencia di mundo pa yega na energia alternativa, ta keda balia cu e mesun cantica y keda sin haci nada. E opcion di hydrocabel a yega di wordo poni riba mesa, pero a dicidi pa no haci un investigacion pa motibo bon conoci. Aki falta e madurez politico.

CAP

Mientras tanto ta di spera cu CAP (Compania Arubano di

Petroleo) por yega na un resultado satisfactorio y anuncia cu si tin petroleo, pa asina nos recupera loke Aruba a perde for di Maart di 2012, aumentando e cuponan di trabao y stabilisa nos economia.

E SPERANSA TA KEDA

Ainda tin ciudadano aki na Aruba cu tin e speranza cu e refineria por draai atrobe, treciendo bek e epoca di gloria cu Aruba tabata aden. Varios refineria grandi a bin y a bay, cu of sin tax holiday, pero mester pensa bek riba tur e empleadonan cu a yega di labora den e refineria tin nan experiencia y cu binida di un refineria, por haci cu famianan por wordo reuni bek.

Ban mira si pa e aña aki, 2014, plegaria di hopi wordo scucha pa haya e bon noticia cu “E refineria a habri bek”. □